



Kerwespriech 1989

Ehr liewe Leit es ess woahr,
in Worfelle ess wirrer Kerwezeit wie alle Joahr.
Die Zeit in der mer die Soije un de Alldoach vergißt,
un liewer moal oaner trinkt un rischdisch woas ißt.
In die Hax werd gebisse, oam Humbe getrunke, gedoanzt un geblert.
Do schmeckt uns es Biër, un ess fraht sich unsern Wert.
Vier Doach loang ziehe mer jetzt wirrer in die Schlaocht,
un dess es fünfte Joahr, wer hätte dess gedoacht.
Ja, seit fünf Joahr Kerweborsch beim Schlabbe, dess ess foi,
dess gefällt aach em Schlabbe, weil er verdient oan soim Woi.
Awwer bedenke muß mer aach debei,
daß er oan de Wertschaft alsemoal macht woas nei.
Erst gabs vorne en neiye Klo,
dodefer warn mer Kerweborsch ach als schun froh.
nämlich woann mer warn all breit,
doann warn die Spurn als net soweit.
Doann hat de Soal gegriggt soi neiyes Klaad,
un heit hot de Schlabbe e neiye Haus -Fassad.
Un noch zwaa Johr Kerb, doann soin mer soweit,
doann hoann mer en Soal fer Oachthunnert Leit.
Ich wünscht es wär schun soweit, do wärn mer all froh,
doch erst singe mer moal heit: " Die Worfeller Kerb ess wirrer do."

Die Worfeller Kerb, die Worfeller Kerb.....

Woas die Worfeller Leit all hoann so getriwwe,
dess hoann mer moal korz uffgeschriwwe.
Im Ort bassiert veel, dess soag ich eich glei,
doch iwverall soin mer aach net debei,
weil mer jo soin in veel Vereune droi,
un do fällt mer aach glei e Story dezu oi.
Unsern 1. Vorsitzende vun de TSG,
der hot aach en Bock geresse, dess ess net mer schee.
Der denkt sich dess Sportlerheim kimmt gar net voran,
es muß e Sitzung her mit alle Moann.
Der gibt en Brief oan de Vorstoand eraus,
oam Freitoag um halb Oacht im Bürgerhaus.
De Sitzungsdoach der ess gekumme,
schnell werd noch e Häppche zu sich genumme,
noch en Schluck genumme oam Bembel,
un doann nimmt de Horst soin Krembel.
Er macht sich uff de Weg ins Ort,
un aus de Trift, do geht de Erwin groad fort.
Ehrn Weg der kreizt sich in de Schul,
dort gehn se aach enoi un hocke sich uff en Stuhl.
Sie hocke do e Ewischkeit,
un koaner zeigt sich weit un breit.
De Erwin freegt: "Ess die Sitzung iwverhaupt dohoi?"
do fällt em Horst uff oamoal nix mer oi,
er hält soi Oiloadung a glei eraus,
" Ei die Sitzung ess jo heit im Bürgerhaus."
Im Bürgerhaus soin se oakumme mit rote Woange,
un die Sitzung die war schun voll im Goange.
Ehr zwaa Buwe seid uns net bees,
ich bin heit a goanz schee nerwees,
drum bringt mer jetzt emoal e Bier,
un die Musik speelt uns " So sind wir."

So sind wir, wir pfeifen auf die Sorgen, so.....

Soamsdoags moijens hoann se sich uffgerafft,
un oam Vereunsheim woas geschafft.
Tischtennis, Fußball un Handball,
hatte zu schiebe en große Wall.
Die Aweit ging moijens gut voran,
bis zum Mittoag - aber dann.
Frisch gestärkt und mit Elan,
kam ein Sandner mit dem Plan.
Do guckt er druff mit Seeleruh,
"Ei ehr schiebt jo em Noachber soi Grundstick zu."
Do war die goanz Aweit umsunst,
un e paar Leit hoann sich vor lache in die Hose geprunst.
Die Schuh voller Dreck un Schmeer,
do kreischt oaner, do muß en Bagger her.
mit dem hoat mer sich net so gehetzt,
un die Worfeller hoann aach emaal Berge versetzt.

Net nur oam Vereunsheim, ach im Haushalt gehts mit de Aweit hoch her,
un ich soag eich die ess alsemoal goanz schee schwer.
Es war um die Mittaogszeit, dess ess koann Bluff,
do stellt die Inge zum Esse Kartoffel uff.
De Alfred kimmt groad erin ins Haus,
un stellt ach glei de Krembel unner de Spüle eraus,
weil er de Inge versproche hat; "Ich mach en goanz bestimmt,
den Abfluß unner de Spüle, der schunn e Woch loang gerinnt."
De Alfred setzt die Rohrzoang uff die Muff,
un hoat dess Rohr a schunn glei uff.
Un während er aus em Rohr macht de Dreck,
macht die Inge oans Flaasch de Speck.
De Alfred macht oam nei je Rohr die Dichtung groad driwwer,
do schäumt bei de Inge de Kartoffeldibbe iwwer.
" ach Gott wo mach ich doabn jetzt hie,
mit der iwverschissisch veele Brie."
Erunner vum Herd un eninn in die Spüle,
un do konnt mer schunn hern em Alfred soi Gefühle.
Mit der haase Brie war er naß vum Kopp bis oan die Fieß
un gegresche hot er wie oam Spieß.
Un dodebei wurd er als blasser,
un die Musik speelt jetzt: "Von den Bergen rauscht ein Wasser."

Von den Bergen rauscht ein Wasser, wollt es wäre kühler Wein.....

Weil mer warn groad beim Haushalt debei,
erzehl ich moal woas vun rer Fraa, die ess in de Reih.
In de Siedlung draus wohnt se, dess wisst ehr all,
die hot woas gebroacht, dess war de greeste Knall.
De Mittoag war erum gespeelt wars Gescherr un sie war froh,
sie moant ehr Sach fer heit, die wär fast gedoh,
doch sie hat jo nemeh dro gedenkt,
daß oan de Loin die Wäsch noch hängt.
Do geht se in de Keller halt,
weil fer oan die Garteloin es ess im Winter e bisje zu kalt.
Ihr Wäschewoann die macht se voll,
mit Hemde, Socke un veel Woll.
Uff halber Trepp do fällt rer oi,
ich muß jo nochmoal in die Drogerie enoi.
De Moantel oa, de "Schoal" um de Hals gelegt,
un mit em Fahrroad Richtung Ort bewegt.
Oan de Drogerie oagekumme,
werd vum Fahrroad sich geschwunge,
in de Loade noigedappt,
un die wichtigste Sache wern sich geschnappt,

Un oan die Kass gehts mit de Sache,
do fängt die Liesl schun laut oa zu lache.
Ingrid du siehst vielleicht aus,
so ging ich aus em Haus net enaus.
Woans noch so modern wär, ich dets net troache,
e paar loange Unnerhose um de Kroache.
Die Ingrid ess goanz versteht un hot sich gedenkt,
ei ich hob jo de Petra ehr Unnerhos umgehängt.
Awwer Ingrid macht dich net verrickt,
jetzt werd mit noch oam Hoammer vun dir erausgerickt.
Vor korzem seid ehr ins Theater goange,
do haste en schwarze Rock oa, den loange.
Wenn mer sich net emaal rischdisch oaziehe koann,
dess steert sogar de Herrmann, doin Moann.
Woann jeder dut schee dich finne,
awwer de weiße Zettel geheert noch inne.
Trotzdem haale mer dich fer e Fraa vun Welt,
woann mer aach uff dich hoann so geschellt.
So oa wie dich hoat de Hermann loang gesucht,
drum speelt die Musik : "Mein Schatz du bist ne Wucht."

Mein Schatz du bist ne Wucht.....

Wenn die Klassekameradin heiert,
do werd beim Poltern kräftisch mitgefeiert.
die Kamerade soage sie mache all mit,
noach Grieshem oan die Grillhit.
De Weg dorthie wurd genau erklärt,
awwer koaner wußt wie mer oam beste fährt.
In Grieshem oagekumme do hern se schun de Krach,
es muß do vorne links soi, newer de Bach.
De Michl un de Adi steije aus,
un hole de große Sack mit em Porzeloan eraus.
Des Zeisch des war schnell uffgeschmisse,
do hoann se erst moal e Bier trinke misse.
Dess Bier dess war goanz schnell gesoffe,
awwer es Brautpaar hot mer noch net getroffe.
Wie de Michl doann die Braut trifft, dut er sich freje,
" Ei die hot awwer frieher oanerst ausgesehje.
Egal, er geht hie und dut e paar Worte mit rer schwätze,
bis doann kam dess große Entsetzé.
Do kreischt de Michel: "Mer soin bei de falsche Leit,
mer gehn un suche die rischdische, mer hoann joh noch Zeit.
schnell werd sich dess kaputtne Porzelloan geschnappt,
un in de große Sack oigepackt.
Doann soin se oan die nächst Grillhitt gefahrn,
dort steije se aus un dunn sich frahn, weil se jetzt bei de rischdische warn.
Dort hoann se doann erst rischdisch gesoffe,
weil se hoann e paar Bekoannte getroffe.
Liewer Michl dess werd dir hoffentlich neme bassiern,
un ich muß mer jetzt erst moal moi Kehl massiern.
Drum singe mer jetzt mit alle Leit,
" Ein Prosit der Gemütlichkeit."

Ein Prosit, ein Prosit, der Gemütlichkeit.....

Bei em Keglerausflug, warn se alle debei,
es war oan em Wocheend Mitte im Mai.
Oam Boahnhof gings los mit Helau,
der Keglerclub " Unner aller Sau."
Gefahrn ess mer iwwer Froankfort un Hoambursch un getrunke woarn ess allerhoand,
bis mer endlich dort war, oam " Weißenhäuser Strand."

Die vier Doach Erholung verginge wie im Troam,
 uff oamoal Sunndoachs moijsens gings doann wirrer hoam.
 Ess ging mit em Bummelzug Richtung Hoamburg Hauptboahnhof,
 moanch oaner hot sich genumme e Mitz voll Schloaf.
 Do hatte mer iwwer drei Stunn Uffenthalt unn wußt net wohie,
 ei wo gibts in de Stadt nur die schäumende Brie.
 Dess Bier ess gelaafe un mer hoann schunn e bisje gelallt,
 weil die Sunn hot uns goanz schee uffs Herrn geknallt.
 Die Zeit verging wie im Flug,
 awwer mer wollte joh net verbasse unsern Zug.
 Koaum dun mer die letzte Scheppscher baafe,
 dun die erste schon oan Boahnsteig laafe.
 Ohne Verluste laafe mer dort oi,
 un ziehe uns noch schnell en Imbiss enoi.
 Do hoann mer gestoanne unrassiert orrer mit Baad,
 un hoann all uff de Zug gewaht.
 Doch zwaa Leit die hoann oafach koa Ruh,
 do laafe se uff die Rolltrepp zu.
 Uff die Rolltrepp gesetzt un dumm geguckt,
 owwe warn se schnell, dess ging ruck-zuck.
 Vunn unne rifft de Hoffi; " Bring zwaa Salami-Weck mit",
 die heern dess un laafe fort, dess war de Hit.
 Fast hämmer noch gesoagt, bringt uns noch e Eis,
 do steht a unsern Zug schunn uff em Gleis.
 Die Dasche geschnabbt un oigesteje,
 do hoann mer die zwaa schunn nemees geseje.
 Bevor mer de Schaffner hoann gehollt,
 ess de Zug a schunn losgerollt.
 De Balzer un de Heiko die warn net debei,
 dess erzeugte bei uns Gelächter un vel Geschrei.
 unn weil die zwaa jetzt in Hoamburg stehn,
 drum singe mer: "Ich hoab moal in Hoamburg en Fermaster gsehn."

Ich hoab moal in Hoamburg en Fermaster gsehn, oh

Zum fünfte moal jährt sich im Schitzehof die Kerb,
 doch ehr Leit ich glaab ehr werd loangsoam merb.
 In de letzte Joahr sinn die zwaa Sääl nemees voll,
 obwohl die Kerweborsch ess treiwe wie doll.
 Fer die Vorbereitung brauche mer veel Geduld un Zeit,
 doch dess mache mer net fer uns sondern fer eisch ehr Leit.
 Aach e paar neije Kerweborsch misse jetzt bald bei,
 sunst ess es mit de Worfeller Kerb bald vorbei.
 Denn nur woann mer all mitmache un treiwe ess goanz doll,
 do wern a Soamstoagsowends die Sääl wirrer voll.
 Aach die Beteiligung der Ortsvereune oam Kerweumzug ess mau,
 noaja, do gibts aach dies Joahr in Worfelle koann Stau.
 Awwer ess sei ach noch erzeehlt,
 daß sich e paar Leit hoann fer uns gequeelt.
 Bedoanke möchte mer uns bei alle Helfer, bei de Musik un bei de Wertschaft,
 fer dess woas se in dem Joahr fer uns hoann geschafft.
 Drum hoff ich ehr seid nächst Joahr aach all wirrer do,
 woann mer wirrer singe : " Die Worfeller Kerb ess wirrer do."

Die Worfeller Kerb, die Worfeller Kerb, die.....!